

Lëtzebuerger Studenten Zürich



Inhalt

| | |
|---|-----------|
| Inhalt | 1 |
| Virwuert vum President | 2 |
| Checklëscht | 3 |
| Zürich, wou ass dann dat? | 4 |
| Fréier sinn et och scho Schwäizer ginn... | 4 |
| Little Big City | 4 |
| Money makes the world go round... | 5 |
| ETH an Uni | 5 |
| Schwäizer schaffen net ëmmer!!! | 5 |
| Wat een ausserdeem nach maache kann... | 6 |
| D'ETH Zürich | 7 |
| Wat ass d'ETH Zürich? | 7 |
| Wat kann een alles do studéieren? | 7 |
| Studieberodung | 7 |
| Wéi ass d'Studium agedeelt? | 7 |
| Stagen | 9 |
| Wéini a wéi gëtt een op der ETH ugeholl? | 10 |
| Opnamprüfung | 11 |
| D'Uni Zürich | 12 |
| Wat a wéi studéiert een op der Uni? | 12 |
| Wéini gëtt een op der Uni ugeholl? Wéi mellt een sech un? | 14 |
| Wat soss nach wichteg ass | 16 |
| Logement | 16 |
| Wat kascht wéivill? | 19 |
| Wou kommen d'Suen hir, wou ginn se hin? | 21 |
| Verschiddenes | 21 |
| Den LSZ | 25 |
| Weider Informatiounen | 27 |
| All wichteg Adressen op ee Bléck | 28 |
| Impressum | 30 |

Virwuert vum President

Léif Lieserinnen, Léif Lieser,

Mam Premièresdiplom an der Hand hält en grousst Kapitel an dengem Liewen op an du stees virun der sécher schwiereger Decisioun, wat maachen ech elo? Bei dësem Choix kommen warscheinlech och eng Rei Froen op, déi mir dir op der Foire de l'Etudiant probéieren sou gutt ewéi méiglech ze beäntweren. Sech fir eng Stad an virun allem fir en Studium ze decidéieren wäert mat Sécherheet däi weidert Liewen prägen, dofir ass et wichteg dass du dir dës Entscheidung gutt iwwerlees an dir Zäit léis bei dëser neier Etapp an dengem Liewen. Fir der dofir eng kleng Stäip ze ginn un däers du dech orientéieren kanns hunn mer der an dëser Broschür all wichteg Informatiounen iwwert Zürech zesummegefaasst.

Wann een un d'Schwäiz denkt, denkt een meeschtens un d'Bierger, Schockela, Aueren, Banken oder Schwäizer Kéis. D'Schwäiz ass awer och bekannt fir déi héich Qualitéit vum Bildungssystem, dat besonnesch zu Zürech. D'Eidgenössische Technische Hochschule Zürich (ETH Zürich) ass eng vun den weltbeschten Héichschoulen an den Beräicher vu Mathematik, Informatik, Naturwëssenschaften an Technologie an dat spigelt sech och an enger ganzer Réi vu Rankinge widder, wou een d'ETH ëmmer nees an Top Positiounen fënnt. D'Universität Zürich (USZ) ass déi gréissten Universitéit aus der Schwäiz an ass virun allem an Economiesfächer eng vun den beschten an Europa. Donieft ginn et nach e puer aner Universitéite wéi z. B. d'Zürcher Hochschule der Künste (ZHdK), d'Zürcher Hochschule für Angewandte Wissenschaften (ZHAW) oder d'Pädagogische Hochschule Zürich (PH Zürich).

Natierlech huet Zürich awer och nach nieft den Studium richteg vill ze bidden. Den Summer bréngt déi ganz Stad zesummen. D'Stroossen fëllen sech mat Leit an laanscht d'Limmat an den Séi fillt een sech wéi an der Vakanz. Am Wanter fënnt sech all Mënsch op den noen Skipisten rëm vue dass d'Bierger gräifbar no leien. Allgemeng eng héich Liewensqualitéit ass garantéiert a spigelt sech esou wuel an den Infrastrukturen, der Sécherheet, der kultureller Vielfalt an dem perfekt ofgestëmmten ëffentlechen Transport erëm – alles Saachen un déi een sech schnell gewinnt an op déi een dann



nëmmen nach ongär verzichte wëll. Net zu lescht huet och d'Nuetsliewen vun Zürech vir jiddereen eppes ze bidden. Vun groussen international bekannten Club'en iwwer Jazz bis hin zu alternativen Baren ass alles derbäi!

En Studium am Ausland ass och eng Erausforderung, et ass een éischte Schratt an Richtung Onofhängegkeet an et muss een sech an engem neien Ëmfeld erëm fannen. Aus dësem Grond ass scho säit 90 Joer ee vun den Haaptziler vum LSZ e klengt Stéck Lëtzebuerg op Zürech ze bréngen. En Club mat ronn 120 Memberen wäerte dir bei allméiglechen Froen zu dengem Studium zur Säit stoen. All Neizougang gëtt bei eis am Ufank vum Semester empfangen an am Laf vum Joer kanns du un flotten Aktivitéiten deelhuelen. Zu dësen zielen ënnert anerem eis Clubrees, en Skiweekend, de legendären Clear the Bottles an net ze vergiessen, den Zürcher Bal. Op onsem Bal gesäis de wat en Team vun 120 motivéierten Studenten an der Lag ass op d'Been ze stellen: dat bekanntsten an beléiftsten Studentenevent am Joer!

Zu gudder Lescht hoffen ech, dass dës Broschür dir weiderhëlleft bei dengem Choix an all deng Froen beäntwert. Falls nach eppes sollt onkloer sinn, kanns du eis gär eng Email ënnert comite@lsz.lu schreiwen oder op eisen Internetsite [www.lsz.lu] weider Infoen fannen.

Vill Spaass beim Liesen!

Felix Engel,
President LSZ

Checklëscht

Virum Studium ...

- ☐ Zulassungsbedingungen vun der ETH/Uni gekuckt (S.10 / S.14)
- ☐ Deadline fir meng Umellung gecheckt (S.10/ S.15)
- ☐ Alleguer déi néideg Dokumenter prett an ageschéckt (S.10/S.15)
- ☐ (Opnamprüfung ETH (S.11))

Ech sinn ugeholl, an elo ?

- ☐ Budget (S.19)
- ☐ Wunnengssich (S.16)
- ☐ Umeldung an Ausländerausweis(S.18-19)
- ☐ Bankkonto (S.21)
- ☐ Krankenversicherung (S. 23)
- ☐ Auto a Führerschäin (S.21-22)
- ☐ Transport Lëtzebuerg - Zürech (S.24)
- ☐ Ëffentlechen Transport zu Zürech (S. 19-20)

Wat maachen zu Zürech ?

- ☐ Den LSZ (S.25)
- ☐ Sport (S.22-23)
- ☐ Fester zu Zürech (S.5-6)
- ☐ Wat leeft soss nach zu Zürech (S.6)





Zürech, wou ass dann dat?

Zürech läit am Schwäizer Mittelland (do wou et nach relativ platt ass) um nördlechen Enn vum Zürichsee, deem sechst-gréisste Séi an der Schwäiz. Den Zentrum vun der Stad läit um Séi an u béide Säite vun der Limmat, dem Floss, deen aus dem Séi erausfléisst. Deen héchste Punkt läit um Uetliberg mat 871 Meter; esou platt ass d'Mittelland also awer net. Wann ee Chance huet, kann een esouguer d'Alpe gesinn, eng Vue, déi een net onbedéngt derzou opfuert an d'Virlesung setzen ze goen... Mat ron



400.000 Awunner ass Zürech déi gréisste Stad an der Schwäiz; de Kanton Zürech ass mat bal 1,4 Milliounen Awunner och deen am meeschte bewunnte Kanton.

Fréier sinn et och scho Schwäizer ginn...

Déi éischt Siidlungen an der Regioun sinn ëm 4300 v.Chr. entstanen. 15 v. Chr. gouf d'Mittelland vun de Réimer besat. Do, wou haut de Lindenhof ass, gouf eng Befestigung gebaut, ee klengen Hafen an natierlech ee gehéizte Bad ugeluecht.

Dat Ganzt hunn si Turicum genannt. No de Réimer koumen d'Alemannen, bis ëm 1519 den Huldrych Zwingli d'Reformatioun zu Zürech agefouert huet. Wéi iwwerall an Europa, ass et ëm 1800 och an der Schwäiz zu enger Revolutioun mat der Aféierung vun enger éischter Helvetescher Republik komm. Wéi dës kuerz dono zesummegefall ass, huet den Napoleon der Schwäiz eng Verfassung diktéiert. Mëtt 19. Joerhonnert gouf dës Verfassung a groussen Deeler revidéiert, an ënnert anerem de Referendum, ee wichtegen Deel vun der Schwäizer Demokratie, agefouert. Ufank 20. Joerhonnert, ass Zürech massiv gewuess, a fänkt un vun der Industrialiséierung ze profitéieren, et gi 15 Gemengen aus der Regioun mat an d'Gemeng Zürech abezunn. Nom Krich hält de Winston Churchill ausgerechent zu Zürech eng bekannte Ried iwwert d'Noutwennegkeet vun engem vereenten Europa.

Little Big City

Zürech brauch sech fir seng relativ bescheide Gréisst awer net hannert den aneren europäesche Metropolen ze verstopen. Am kulturelle Liewen ass ëmmer eng lass an och fir Touriste lount sech e klengen Ausflug. Kulturell Highlighte sinn ënnert anerem: d'Niederdorf, d'Bahnhofstrasse, de Lindenhof, de Limmatquai, d'Opernhaus an déi sëllech Kierchen, fir der nëmmen e puer ze nennen. Zürech ass eng aussergewöhnlech schéin a propper Stad, déi sech ronderëm d'Alstad an den Däller vun der Limmat an der Sihl opgebaut huet.

[www.zuerich.com]

Et ginn och eng Hällewull Méiglechkeeten sech um kulturelle Plang ze betätigen. Dat geet vu Concerten, Festivaller, Musicalen, iwwert Operen, Ausstellungen, an Theateropféierungen bis hin zu Stroossefester a Festivaller an der ganzer Stad.

[www.ticketcorner.ch] [www.opernhaus.ch]
[www.kunsthhaus.ch] [www.schauspielhaus.ch]

Sportlech brauch Zürech sech och net mat senge Profiequippen am Fussball an Äishockey ze verstopen. Op alle Fall lount et sech ee mol de Wee an de Stadion ze fannen.

[www.gcz.ch] [www.fc.ch] [www.zsclions.ch]



Money makes the world go round...

Zürech ass de Wirtschaftszentrum vun der Schwäiz, besonnesch markant ass den extrem groussen Finanzsektor. Wéi Lëtzebuerg, baséiert d'Zürcher Wirtschaft op Déngschtleeschung, dorënner falen net nëmmen d'Banken a Versécherungen, mee och d'Berodung vun Entreprisen an d'Immobilieverwaltung. Donieft huet awer och eng Rei international Industrie hire Sëtz oder eng Filial zu Zürech.

[www.awa.zh.ch] [www.six-group.com]
[www.greaterzuricharea.ch]

ETH an Uni

Zu Zürech gëtt et souwuel eng Uni wéi och eng Technesch Héichschoul (ETH). D'ETH Zürich, déi 1855 gegrënnt gouf, ass weltwäit gutt ugesinn, an dat virun allem duerch d'Fuerschung déi hei bedriwwen gëtt. Am Ganze ginn et 16 Departementer, déi an der Fuerschung an ënnerschiddlechste Beräicher vu Verkéiersplanung bis Kriibsfuorschung tätég sinn. Un der ETH schaffe ronn 500 Professer an iwwer 10'000 zousätzlech Ugestallter fir méi wéi 20'000

Studenten an Doktoranden (dovu 37% Auslänner an eng Honnert Lëtzebuerg) ze beschäftegen. Eréischt 2018 krut den Alessio Figalli, e Mathematik Professor op der ETH, d'Fields Medail an huet sech domadder agereit an d'Lescht vun ETH Studenten a Professer déi en international renomméierte Präis gewonnen hunn, dës nieft Berühmtheete wéi Einstein, Röntgen an Pauli.

[www.ethz.ch]

D'Universität Zürich ass déi gréisst Schwäizer Héichschoul an ass ebenfals e wichtege Standuert fir d'Fuerschung. Mat méi wéi 26'000 Studenten, op 7 Fakultéiten, ass se e gutt Stéck méi grouss wéi d'ETH, huet awer nëmme knapp 8'500 Mataarbechter, dovunner 600 Professer. A Saache Fuerschung muss d'Uni sech net hannert der ETH verstopen, si zielt zu deene beschten an Europa am Beräich Klinesch Medezin, an ass a 5 Beräicher zu där beschter Schwäizer Uni ernannt ginn. Sou kënnt zum Beispill den Nobelpreispriizgewënner fir Medezin vun 1996, den Rolf M. Zinkernagel vun der Uni. An der Fuerschung schaffen d'Uni an d'ETH enk zesummen. Obschonns d'Uni vill méi Studenten huet, sinn di meeschte Lëtzebuerg ob der ETH.

[www.uzh.ch]

Schwäizer schaffen net ëmmer!!!

Déi 2 wichtegst Fester an der Stad, baséieren op laangjäregen Traditiounen a sinn d'Sechseläuten (spréich: "Säichsilüüte") an d'Knabenschiessen. D'Säichsilüüte ass eng Kavalkad vun den Zünften duerch d'Stad. Membere vun dësen Zünften (si entspreche méi oder wéineger dem lokale Who's Who vum Regierungsmember bis hin zum "einfache" Räichen), spadséieren an traditionellen Truechten hannert enger Musekskapell duerch d'Stad. An dann nomëttes um 6 Auer, gëtt de Böög verbrannt. De Böög ass ee stréiene Männchen, deen op engem risegen Holzkoups steet. Wat säi Kapp méi séier explodéiert, wat de Summer méi schéi gëtt. Et ass also souzesoen eng Zürcher Variant vum Buergebrennen.

[www.sechselaeuten.ch]

Beim Knabenschiessen geet et virun allem ëm ee Schéissconcours fir Jugendlecher tëschent 12 a 16 Joer. Am interessantsten ass dann awer den Nieweprogramm, nämlech déi gréisste Chilbi (Kiermes) vun der Schwäiz.

[www.knabenschiessen.ch]

All dräi Joer, d'nächste Kéier 2022 ass dat gréisste Fest an der Schwäiz: d'Zürifäscht. Während dräi Deeg steet d'Stad esou zimlech op der Kopp, wa ronn 2 Milliounen Besucher sech ob Grillfester, Partyen a Concerten amüséieren.
[www.zuerifaesch.ch]

D'Street Parade, déi et scho säit Ufank vun den 90er gëtt, huet d'Loveparade vu Berlin als gréissten Technoparty ofgeléist. All Joer am August rave bal eng Millioun Technofreaken am Zentrum vun der Stad. Trotz Examenszäit ass et bal ee Muss fir do dobäi ze sinn.
[www.streetparade.ch]

Aner wichteg Datumer zu Zürich
Weltklasse Zürich, ee grouss Liichtathletikmeeting aus der Diamond League.
[www.weltklasse.ch]

Expovina, eng grouss Wäinausstellung op Schëffer um Zürisee. Dat huet de Virdeel, datt een als Excuse fir all fäleg Koordinationsproblemer ka behaupten et wier ee just e bëssi séikrank...
[www.expovina.ch]



Monday Night Skate, wou sech all zweete Méinden am Summer d'Skater vun Zürich treffen (bis zu 5000 Leit) fir e klengen Tour duerch d'Stad ze maachen.
[www.nightskate.ch]

Freestyle, hei trefft sech d'Weltklass vun de Mountainbiker an Skateboarder déi spektakulär Tricke maachen. Dat ganz ass am September beim Séi, an war 2019 während dem Züri-Fäscht.
[www.freestyle.ch]

Wat een ausserdeem nach maache kann...
Jiddwereen, deen sech Zürich eraussicht fir do ze studéieren, huet wierklech keng Schwierigkeeten seng Fräizäit ze verbréngen, an dat net well d'Schoul een esou staark beschäftegt, datt ee guer keng Fräizäit méi hätt. Esou kann een am Wanter relativ licht a schnell an d'Schigebidder kommen an sech e bëssi sportlech betätigen, am Summer dann huet een de Séi direkt viru senger Dir. Vun der Uni an der ETH aus ginn iwwer 120 Sportarten vu Fussball iwwer Golf, Paragliding, Danzen, Snowboard, Inlineskating, bis hin zu Yoga, Sauna an Entspannungstraining ugebueden.

No de Virlesunge kann ee mat Kollegen duerch d'Niederdorf spadséieren a ganz interessant Plazen entdecken. Hei fënnt een esou zimlech alles: Kleederbutteker mat dem "dernier cri" aus aktuellster Moud, awer och der mat "normalem" Sortiment, Bistron, Pub'en a Restauranten, Kinoen, Jazzkellere, ... Ween sech et natierlech leeschte kann, kann och emol an d'Bahnhofstrasse akafe goen, oder op mannst sou maache wéi wann. An owes ass eng Hällwull Leit an der Stad. Déi kleng Gässelcher a Bistron sinn net sele strubbelvoll, an an de Puben ginn och emol d'Dëscher aus dem Wee geraumt fir eng Danzpist z'improviséieren well d'Musek einfach ze



gutt ass fir roueg stoen ze bleiwen. An och a punkto Disco an Clube kann Zürich mat deenen gréissten mathalen, well hei ass vun Elektro iwwer Techno bis zum Rock fir jiddereen eppes dobäi. Partye ginn et der all Dag genuch et muss een sech just kënnen decidéieren. Ween sech also owes zu Zürich langweilt, deen ass selwer schold, oder huet seng Sue schonn de Weekend virun ausginn.
[www.zuerich.usgang.ch]
[www.students.ch] [www.asvz.ch]



D'ETH Zürich

Wat ass d'ETH Zürich?
Un der Eidgenössischen Technischen Hochschule zu Zürich kann ee praktesch nëmmen Natur- an technesch Wëssenschafter studéieren. D'Schoul ass ganz modern equipéiert a bitt esou optimal Konditiounen fir Studium a Fuerschung. D'ETH ass eng vun de renomméiertsten Universitéiten weltwäit a lant regelméisseg an den Top 10 vun den internationalen Universitätsrankingen.
[www.ethz.ch]



Wat kann een alles do studéieren?
All d'Studiëgänger déi d'ETH ubitt fannt der an der Tabell op der nächster Säit.

Studieberodung
Op der ETH gëtt et awer och eng Studienberatungsstelle, déi iwwer all méiglech Studiëgänger Auskunft gëtt an och Dokumentatioun derzou huet:

Rebecca Ridolfi
ETH Zürich, StS, Büro HG F 69.2
Tel.: +41 (0)44 633 4902
E-Mail: rebecca.ridolfi@sts.ethz.ch
studienberatung@sts.ethz.ch

Wann een sech nach net ganz sécher ass, wat ee studéieren soll, da kann dës Platz engem sécher weiderhëllefen, woubäi béid Studienberater, onofhängeg vun hirem Schwéierpunkt, op all är Froe kënnen äntweren. Eng gutt Méiglechkeet ass och sech iwwer Internet iwwer déi verschidde Studiëgänger z'informéieren.
[www.sts.ethz.ch] [www.ethz.ch/studium]

Wéi ass de Studium agedeelt?
Op der ETH sinn all Studiëgänger vum traditionelle System op den international unerkannte Bachelor/Master-System ëmgestallt ginn. De Studium ass folgendermoossen agedeelt:

| Semester | Prüfungen | Credits | Titel |
|-------------------|-------------------------------------|----------|----------|
| Bachelor-Studium: | | | |
| 1. + 2. | Basisprüfung* | 60 | |
| 3. – 6. | Semesterprüfungen, Bacheloraarbecht | 120 | Bachelor |
| Master-Studium: | | | |
| 7. + 8. | Semesterprüfungen | | |
| 9. | Masteraarbecht | 90 - 120 | Master |

*Verschidde Studiëgänger testen am Ament d'Opdeelung vun dësem Joresblock op een Block am Wanter an een am Summer.

| Architektur und Bauwissenschaften | |
|--|--|
| Architektur | Bsc ETH Arch. Msc ETH Arch. |
| Bauingenieurwissenschaften | Bsc ETH Bau-Ing. Msc ETH Bau-Ing. |
| Umweltingenieurwissenschaften | Bsc ETH Umwelt-Ing. Msc ETH Umwelt-Ing. |
| Geomatik und Planung | Bsc ETH Geomatik-Ing. Msc ETH Geomatik-Ing. |
| Ingenieurwissenschaften | |
| Maschineningenieurwissenschaften | Bsc ETH Masch.-Ing. Msc ETH Masch.-Ing. |
| Elektrotechnik und Informationstechnologie | Bsc ETH EEIT Msc ETH EEIT |
| Informatik | Bsc ETH Inf.-Ing. Msc ETH Inf.-Ing. |
| Materialwissenschaft | Bsc ETH Mat.-Wiss. Msc ETH Mat.-Wiss. |
| Naturwissenschaften und Mathematik | |
| Mathematik/Angewandte Mathematik | Bsc ETH Mathematik Msc ETH Mathematik |
| Rechnergestützte Wissenschaften | Bsc ETH RW Msc ETH RW |
| Physik | Bsc ETH Physik Msc ETH Physik |
| Chemie | Bsc ETH Chemie Msc ETH Chemie |
| Chemieingenieurwissenschaften | Bsc ETH Chem.-Ing |
| Chemie- und Bioingenieurwissenschaften | Msc ETH Chem. Bio.-Ing |
| Interdisziplinäre Naturwissenschaften | Bsc ETH Interdisziplinäre Naturwissenschaften Msc ETH Interdisziplinäre Naturwissenschaften |
| Biochemie - Chemische Biologie | Bsc ETH Biochem Chem Biol |
| Biologie | Bsc ETH Biologie Msc ETH Biologie |
| Pharmazeutische Wissenschaften | Bsc ETH Pharm.-Wiss. Msc ETH Pharm.-Wiss |
| Systemorientierte Naturwissenschaften | |
| Erdwissenschaften | Bsc ETH Erdw. Msc ETH Erdw. |
| Umweltnaturwissenschaften | Bsc ETH Umwelt-Natw. Msc ETH Umwelt-Natw. |
| Agrarwissenschaften | Bsc ETH Agr. Msc ETH Agr. |
| Lebensmittelwissenschaften | Bsc ETH Lm Msc ETH Lm |
| Gesundheitswissenschaften und Technologie | Bsc ETH HST Msc ETH HST |
| Medizin (besondere Aufnahmebedingungen) | |

Zusätzlech gi folgend Masterstudiegäng mat besonnegen Opnahmebedéngungen ugebueden

Raumentwicklung und Infrastruktursysteme, Integrated Building Systems, Verfahrenstechnik, Mikro und Nanosysteme, Nuclear Engineering, Robotics, Systems and Control, Biomedical Engineering, Energy Science and Technology, Computational Biology and Bioinformatics, Biotechnologie, Data Science, Statistics, Quantitative Finance, Hochenergiephysik, Neural Systems and Computation, Medicinal and Industrial Pharmaceutical Sciences , Applied Geophysics, Atmospheric and Climate Science, Management, Technologie und Ökonomie, Comparative and International Studies, Geschichte und Philosophie des Wissens, Science, Technology and Policy.
[\[https://ethz.ch/de/studium/master/studienangebot.html\]](https://ethz.ch/de/studium/master/studienangebot.html)

Dës Tabell ass just indicativ an entsprécht enger Aart Standardstudium. Et ass gutt méiglech, dass de Bachelor oder Master e Semester méi laang ginn. Ofhängeg vum Studiégank fält d’Bacheloraarbecht och ewech.

All Kreditpunkte kënnen am European Credit Transfer System (ECTS) ugerechent ginn. Den ECTS vereinfacht den Austausch op déi meeschten Unien an Héichschoulen innerhalb vun Europa, a steet och an engem enken Zesammenhang mat der Konventioun vu Bologna.



Wann een eng Prüfung bei der éischter Kéier net packt, däerf ee se nach eng zweete Kéier maachen. Et verléiert een awer net onbedéngt Zäit, well et kann een normal mam Studium virufueren. No enger zweete Kéier Duerchfale kann een zwar trotzdeem op der ETH bleiwen, mee et däerf een déi Prüfung net nach eemol widderhuel, wat een vu verschidde Studiégäng ausschléisse kann. Mat Masteraarbecht ass et an der Reegel méiglech a 5 Joer mam komplette Studium fäerdeg ze ginn.

Ee Studiëjoer besteet aus engem Hierscht- an engem Fréijoerssemester (et kann een awer nëmmen am Hierschtsemester mam Bachelor-Studium ufänken). D’Hierschtsemester fänkt Mëtt September un an dauert bis Enn Dezember, d’Fréijoerssemester ass vun Enn Februar bis Enn Mee, béid dauere 14 Wochen.

[\[https://ethz.ch/services/de/news-und-veranstaltungen/akademischer-kalender.html\]](https://ethz.ch/services/de/news-und-veranstaltungen/akademischer-kalender.html)

All Joer ginn et zwou Examenssessiounen: eng am Wanter (Enn Januar) an eng am Summer (Ufank August). Verschidde Studiégäng hunn am éischte

Joer am Wanter keng Examen. Ab dem 3. Semester hunn déi meescht awer no all Semester eng Examenssessioun. D’Examen am Bachelor bestinn an deene meeschte Fäll aus „Blockprüfungen“, do zielt déi aus mat Koeffiziente berechent Moyenne vun e puer Examen, et muss een also net onbedéngt all Exame packen. Spéider am Studium kommen dann éischter Eenzelexamen. Während dem Semester kënne kleng Tëscheklause sinn, déi jee no Fach bis zu engem Drëttel vun der Endnote kënnen ausmaachen.

Stagen

Maschinnebauer mussen am Bachelor 5 Wochen Handwierssstage maachen, deen een zu Lëtzebuerg ënner anerem bei Arcelor-Mittal, Paul Wurth, Goodyear oder der CFL maache kann. Am beschten ass et, wann s de dee virum Studium oder tëscht dem 1. an 2. Semester méchs. Am Master musse Maschinnebauer, Materialwëssenschaftler an Elektrotechniker 12 Wochen Industriepraktikum maachen. Weider Informatiounen kriss du beim Studiensekretariat.



Architekturstudente mussen 12 Méint Stage maachen, dovu mindestens 6 Méint hannerteneen op der selwechter Platz. Déi meescht maachen dowéinst nom Bachelor ee Joer Paus an deem se hire Praktikum maachen. Als Architekt dauert däi Studium also 1 Joer méi laang.

Och déijéineg, déi Ëmwelt- an Naturwëssenschafte studéieren, mussen am 7. Semester e Stage maachen.

A verschidene anere Studiëgänger ass och een obligatoresche Stage ze maachen, mee dat ass meeschtens eréischt am Master de Fall.

Och wa keng Stage virgeschriwwen sinn, soll een trotzdeem während dem Studium dovun profitéieren. Praxiserfahrung an der Industrie ze sammelen.

Wéini a wéi gëtt een op der ETH ugeholl?

Als Opnambedingung fir d'ETH muss een an der Moyenne vu Mathé, enger Wëssenschaft an enger Sproch mindestens 40/60 (et gëtt net geronnt) hunn. Dëst gëllt allerdéngs nëmme fir d'Sektioun B an C. Fir d'Sektioun I lafen am Moment Gesprécher mat der ETH. Eng fest Zouschunn mir vun hirer Säit nach net. Aus Erfahrung wësse mir awer, dass Schüler vun dëser Sektioun ouni Opnamexamen ugeholl ginn, wann si d' Moyenne hunn.

D'Moyenne gëtt folgendermoosse gerechent:

| | |
|---|-----|
| Mathematik I an II (Moyenne) | 1/3 |
| Bescht Nummer vu Physik, Chimie oder Biologie | 1/3 |
| Bescht Sprooch | 1/3 |

Natierlech gëllt fir d'Sektioun B keng Bio a fir d'Sektioun C brauch ee keng Moyenne an der Mathé ze rechnen. Bei der B, zielt d'Mathématiques II mat der Informatik zesummen, well se net getrennt um Diplom ugeschriwwen ginn.

D'Studente vun deenen anere Sektiounen, oder déi d'Moyenne net hunn, müssen e reduzéierten Opnamexamen schreiwen, deemno wéi d'ETH et decidéiert. D'Sektioun A huet an der Schwäiz schlecht Kaarten, si gëtt net méi als Ofschloss unerkannt, well se net déi gefuerdert Wëssenschafter beinhalt. Studente vun enger A müssen also de kompletten Opnamexamen maachen, wat enger Schwäizer Matura entsprécht. Weider Infos fannt dir um Site vun Swissuniversities.

[\[https://www.swissuniversities.ch/themen/studium/zulassung-zu-den-universitaeren-hochschulen/laender#LUJ\]](https://www.swissuniversities.ch/themen/studium/zulassung-zu-den-universitaeren-hochschulen/laender#LUJ)

Fir sech unzemellen, muss ee sech bis spéitstens den 30. Abrëll online op folgendem Link bewerben: [\[http://www.bewerbung-bachelor.ethz.ch\]](http://www.bewerbung-bachelor.ethz.ch)

D'Umeldeformulaire muss een erausdrecken a mat folgenden Dokumenter

- Passfoto (Original)
- Tabellarësch Liewenslaf
- D'Zensur vun deenen 3 leschte Joren (3^{ème}, 2^{ème} a 1^{ère}; déi vum 1. Semester wëllen se an der Reegel gesinn)
- Zahlungsnachweis vun der Anmeldegebühr (CHF 150 fir Ausländer) soss kucken se deng Demande guer net

u folgend Adresse schécken:

Zulassungsstelle
ETH Zentrum
Anmeldung Bachelor
HG F 21.3
Rämistrasse 101
CH-8092 Zürich
Tel.: +41 (0)44 633 82 00
09-11 Uhr und 14-16 Uhr
E-Mail: zulassung@ethz.ch

Nom Examen schécks du hinnen dann d'Original (eng Copie Conforme geet net duer) vum Diplom an eng Copie Conforme vun denger Carte d'Identité an. Der ETH ass bekannt, datt d'Lëtzebuurger Studenten hiren Diplom eréischt Ufank Juli kréien. Et ass dofir kee Problem wann een dee eréischt no der Frist erareecht soulaang ee sech awer bis den



30. Abrëll beworben huet an hinne matgedeelt huet, datt den Diplom nokënnt. Allgemeng bleift ze soen dass méttlerweil vill Korrespondenz per Mail geet. Et lount sech also d'Mailbox reegelméisseg ze checken. D'ETH réit souguer, datt een sech bei hinne mell (Email: zulassung@ethz.ch) wann een iergendwellech Fristen net kann anhalen oder soss Mëssverständneser optauchen.

[\[https://www.ethz.ch/de/studium/anmeldung-bewerbung/bachelor/andere-qual/bewerbung\]](https://www.ethz.ch/de/studium/anmeldung-bewerbung/bachelor/andere-qual/bewerbung)

Fir d'Zouloossung an ee Masterstudiëgänger gëllen aner Konditiounen an Fristen. Am beschten informéiert een sech beim jeeweilegen Departement. [\[https://ethz.ch/de/studium/master/bewerbung.html\]](https://ethz.ch/de/studium/master/bewerbung.html)

Opnamprüfung

Eng "reduzierte Aufnahmeprüfung" muss theoretesch jiddweree maachen, dee vun de Sektiounen D, E, F, G kënnt oder dee vun de Sektiounen B, C kënnt an d'Moyenne net huet. Mir rode jidderengem, deen theoretesch déi reduzéiert Prüfung misst maachen, sech domm ze stellen an trotzdeem ze probéieren, sech unzemellen.



Fir déi, déi d'Prüfung trotzdeem musse maachen: den Termin fir d'Opnamprüfung ass Métt August. [\[https://www.ethz.ch/de/studium/anmeldung-bewerbung/bachelor/andere-qual/eth-aufnahmepruefung\]](https://www.ethz.ch/de/studium/anmeldung-bewerbung/bachelor/andere-qual/eth-aufnahmepruefung)

Et kann een sech awer net direkt fir d'Opnamprüfung umellen. Fir d'éischt brauch een en Zulassungsentscheid vun der Zulassungsstelle. D'Prüfung selwer ass op Däitsch iwwert Mathé, Physik, Chimie a Biologie.

Den AKAD an d'Privatschoul ExamPrep GmbH (Frau Freimann) bidde Virbereedungskurse fir den ETH Opnamexamen un. Dëst geet vu Coursen iwwert ee ganz Semester, bis zu eenzele Lektionen am Summer virun den Examen. Dee Spaass ass allerdéngs net ganz bëlle. Wann's du plangs d'Opnamprüfung ze schreiwen, da mell dech einfach beim Comité [\[comite@lsz.lu\]](mailto:comite@lsz.lu), mir kënnen dech mat Leit verbannen déi d'Opnamexamen geschriwwen a gepackt hunn. Déi kënnen der wäertvoll Tipps ginn.

[\[http://www.akad-college.ch/\]](http://www.akad-college.ch/)
[\[http://www.hochschulvorbereitung.ch/\]](http://www.hochschulvorbereitung.ch/)

Déi "umfassende Aufnahmeprüfung" däerf jiddweree maachen, egal vu wéi enger Schoul e kënnt. Deen Examen ass equivalent mat der Matura (Première an der Schwäiz).

Ee Joer op der Uni Lëtzebuerg gëtt net ugerechent. Dat geet esouguer sou wäit, datt een, deen d'Moyenne vun 40/60 am Premièresexamen net hat an deen een Joer op der Uni.lu gemaach a gepackt huet, trotzdeem nach déi reduzéiert Opnamprüfung maache muss.



Kontaktadress fir Studieninformatiounen an allgemeng Informatiounen:

Rebecca Ridolfi
ETH Zürich, StS, Büro HG F 69.2
Tel.: +41 (0)44 633 49 02
E-Mail: rebecca.ridolfi@sts.ethz.ch

Gabriele Kläy Schönenberger
ETH Zürich, StS, Büro HG F 69.2
Tel.: +41 (0)44 632 6051
E-Mail: gaby.klaey@sts.ethz.ch
[\[https://ethz.ch/de/die-eth-zuerich/organisation/abteilungen/studentische-dienste.html\]](https://ethz.ch/de/die-eth-zuerich/organisation/abteilungen/studentische-dienste.html)

Kontaktadress fir d'Umeldung:

Zulassungsstelle
ETH Zentrum
Anmeldung Bachelor
HG F 21.3
Rämistrasse 101
CH-8092 Zürich
Tel.: +41 (0)44 633 82 00
E-Mail: zulassung@ethz.ch



D'Uni Zürich

Wat a wéi studéiert een op der Uni?

All d'Studiegäng déi d'Uni Zürich ubitt fannt der an der Tabell op der nächster Säit oder op folgenden Websäiten.

[<http://www.degrees.uzh.ch/de/bachelor/>]

[<http://www.degrees.uzh.ch/de/master/>]

Den Oflaf vum Studium op der Uni ass net esou fest gereegelt wéi op der ETH. Am Prinzip kann ee soen dass de Studium op der Uni, éischter engem Selbststudium entsprécht. Et huet een am Allgemengen net souvill Virlesungsstonne wéi d'Studenten op der ETH, dofir muss een awer émsou méi doheem schaffen, an sech selwer organiséiere kënnen.



Anescht wéi op der ETH, wou ufanks d'Prüfungen am Block gepackt musse ginn, bitt d'Uni sougenannte Moduler un. All Modul muss eenzel gepackt gi. Wann een ee Modul net packt, kann een dat Modul widderhuelen. Wéini een dëst mëscht, ass net virgeschriwwen. Trotzdeem ass et op der Uni d'selwecht wéi op der ETH: et gi just 2 Versich pro Modul. Dozou kënnt, dass d'Uni e sougenannte Joker pro Studium ubitt. Dësen erméiglecht et engem, bei engem Modul en 3. Versuch ze schreiwen.

All weider Detailer fënnt een op der Internetsäit vun der Uni, respektiv am Studienführer deen een an der Rektoratskanzlei ze kafe kritt.

[www.uzh.ch]

I. Theologische Fakultät

Religionswissenschaften

Theologie

II. Rechtswissenschaftliche Fakultät

Rechtswissenschaft

III. Wirtschaftswissenschaftliche Fakultät

Wirtschaftswissenschaften

Vertiefungsrichtungen:
Banking and Finance, Betriebswirtschaftslehre, Volkswirtschaftslehre

Informatik

IV. Medizinische Fakultät

Humanmedizin

Zahnmedizin

V. Vetsuisse Fakultät

Veterinärmedizin

VI. Philosophische Fakultät

Psychologie

Sozialwissenschaften

Politikwissenschaften, Publizistik- und Kommunikationswissenschaften,
Soziologie, Ethnologie, Populäre Kulturen

Sonstige

Erziehungswissenschaften, Englische Sprach- und Literaturwissenschaft,
Griechische Sprach- und Literaturwissenschaft, Islamwissenschaft,
Japanologie, Lateinische Sprach- und Literaturwissenschaften,
Osteuropastudien, Prähistorische Archäologie und Humanökologie,
Sinologie, Vergleichende Indogermanische Sprachwissenschaft,
Vergleichende Romanische Sprachwissenschaft, Allgemeine
Geschichte, Allgemeine Sprachwissenschaft, Computerlinguistik und
Sprachtechnologie, Deutsche Sprach- und Literaturwissenschaft,
Französische Sprach- und Literaturwissenschaft, Italienische Sprach- und
Literaturwissenschaft, Klassische Archäologie, Kulturwissenschaft der
Antike I, Kulturwissenschaft der Antike II, Kunstgeschichte, Kunstgeschichte
Ostasiens, Musikwissenschaft, Osteuropäische Geschichte, Philosophie,
Sinologie f. native Speakers, Klassische Sinologie, Moderne Sinologie,
Skandinavistik, Slavische Sprach- und Literaturwissenschaft, Spanische
Sprach- und Literaturwissenschaft, Vergleichende germanische
Sprachwissenschaft

VII. Mathematisch- Naturwissenschaftliche Fakultät

Bachelor und Master:

Biochemie : Biomolecular Track, Chemical Track

Biomedizin

Biologie

Chemie

Erdwissenschaften

Geographie

Mathematik

Physik

Wirtschaftschemie

Ausschliesslich Master:

Computational Science

Computergestützte Biologie und Bioinformatik

Medizinische Biologie

Neuronale Systeme und Informationsverarbeitung

D'Uni Zürich

Wéini gëtt een op der Uni ugeholl? Wéi mellt een sech un?

Medezin

Den Abléck ginn iwwerhaupt keng auslännesch Studente fir d'Grondausbildung ugeholl. Fir Studenten, déi sech spezialiséiere wëllen, ginn et awer Méiglechkeete fir ugeholl ze ginn.



Aner Richtungen

Am Allgemenge war et ëmmer méi liicht, fir op der Uni ugeholl ze gi wéi op der ETH (meeschtens ass keng Moyenne erfuerdert). Dëst ass awer elo net méi fir all Studiengang wouer. D'Uni Zürich verlaangt fir all Studiengang, wou d'Uni Lëtzebuerg ee selektiivt Zulassungsverfahren huet, ee Studienplatznachweis.

Wann den entsprecheende Studiengang net op der Uni Lëtzebuerg ugebuede gëtt, oder d'Zulassungsverfahren net selektiv ass, ass kee Studienplatznachweis erfuerderlech.

En Studienplatznachweis ass een Nachweis, dass eng Zulassung am betreffenden auslännesche Studieprogramm (an eisem Fall d' Uni Lëtzebuerg) erfollegt oder am Fall vun enger Bewerbung erfollege géif. Eng Immatrikulationsbescheinigung ass awer net néideg. D'Uni Lëtzebuerg weess doriwwer Bescheid an stellt der an dësem Fall en Certificat aus. Vue dass sech déi ganz Konditiounen fir d'Umeldungen eréicht dëst Joer geännert hunn, stinn nach vill Froen am Raum, déi mir als Comité sou schnell wei méiglech probéieren ze klären. Bei Froen oder Problemer schreift eis eng E-Mail un comite@lsz.lu a mir probéieren dann mat dir zesummen eng Léisung ze fannen.



Ee feelende Studienplatznachweis kann duerch eng bestane "Ergänzungsprüfung der schweizerischen Hochschulen (ECUS)" kompenséiert ginn. Dës Prüfung fënnt am August statt an kascht CHF 980, ass also dowéinst just als absolut Noutléisung ze empfeelen. [www.ecus-edu.ch]

D'Sektioun A gëtt op der Uni Zürich net unerkannt. Fir ganz sécher ze goen ass et natierlech am beschten direkt bei der Uni nozefroen (admission@uzh.ch). Déi genau Konditiounen sinn och nach eng Kéier ënnert dësem Link ze fannen:

[<https://www.swissuniversities.ch/themen/studium/zulassung-zu-den-universitaeren-hochschulen/laender#LU>]



Déi, déi op der Uni Lëtzebuerg ee Joer gemaach a gepackt hunn, kënnen eventuell an dat drëtt Semester opgeholl ginn.


D'Umelle geet am Prinzip d'selwecht wéi bei der ETH - oppassen op d'Terminer. Et kann een sech fir verschidde Studiëgänge souwuel am Hierscht- ewéi am Fréjoerssemester umellen. (Am Fréjoerssemester ass den Delai den 30. November, fir d'Hierschtsemester ass et den 30. Abrëll, et kann een sech heiansdo och nach méi spéit umellen, mee dat kascht da méi.)

Kontaktadress fir Studieninformatiounen:

Universität Zürich
Universitätskanzlei
Rämistrasse 71
CH-8006 Zürich
[www.uzh.ch]

Kontaktadress fir d'Umeldung:

Universität Zürich
Ressort Studierende
Zulassungsstelle für Studierende mit ausländischer Vorbildung
KOL F 107
Rämistrasse 71
CH-8006 Zürich
Tel.: +41 (0)44 634 22 36
E-Mail: admission@uzh.ch




Wat soss nach wichtig ass

Logement

Allgemeng

Ier s du dech zu Zürich op d'Wunnengssich mäss, solls du dir iwwerleeën, wat fir eng Art vun Wunneng iwwerhaupt fir dech a Fro kënn. Hei ginn et e puer Méiglechkeeten, wéi z. B. eleng wunne goen, mat puer Leit eng WG grënnen oder an eng bestoend WG anzéien (dëst ass weider ënne méi am Detail erkläert).



Allgemeng gëllt, dass de dech ëmmer informéiere solls, op Niewekäschten (Stroum, Waasser, Heizung) am Präis schonn mat abegraff sinn oder net.

Informéier dech och, op wat fir engem Campus deng Virlesunge wäerte sinn, et gi Studiëgänger déi haaptsächlech am Zentrum sinn, an anerer déi haaptsächlech um Campus Hönggerberg sinn. Zürich ass an verschidde Kreesser vun 1-12 agedeelt.

D'Kreesser 5, 6, 9, 10, an 11 sinn dobäi vun der Lag an vum Budget hier déi, wou am beschten geegent sinn fir eng Studentewunneng. Du kanns och ausserhalb vun Zürich, z.B. zu Dietikon, Schlieren, Regensdorf, Wallisellen, asw. eng Wunneng sichen. Do ass den Trajet fir op d'Uni méi wäit (an oft muss een och fir den ëffentlechen Transport eng Zone zousätzlech bezuelen), mee dowéinst sinn d'Präisser och méi niddreg. An verschiddene Fäll huet een awer vun deene Platzen aus eng gutt Zuchverbindung an brauch da fir op d'Uni awer nëmmen 30 Minuten, dat muss een vu Fall zu Fall kucken.

Fir eng Iddi ze kréien, wéi wäit et mam ëffentlechen Transport vun der Wunneng bis bei d'Uni ass, kanns de op www.zvv.ch nokucken, wéi laang een Trajet dauert (pass d'Auerzäit an den Wochendag un, well owes an sonndes fuere manner Busser, Zich an Trammen). Du kriss bei denger Sich och ugewisen, wéivill Tarifzonen den Trajet huet, d'Zone 110 (Zürich) zielt dobäi als 2 Zonen, all weider Zone zielt als 1 Zone). De genauen Tarifzonenplang ass och op der Websäit ze fannen. Schlussendlech bleift nach ze soen, dass dat hei just Tipps sinn, et gi sécher nach weider wichtig Saachen an sécherlech aner Méiglechkeeten eng Wunneng ze sichen.

Falls du weess, dass du op Zürich studéiere kënnst, schreif eis eng Email op comite@lsz.lu oder schreif eis op Facebook, mir huelen dech dann an eis Facebookgrupp fir zukünfteg LSZ'ler op, do ginn och heiansdo Wunnengen oder Zëmmeren dra gepost, déi fräi ginn.

Eng weider Facebookgrupp, wou all Zort vu Wunnengen oder Zëmmeren gepost ginn, ass d'Säit Sharing is Caring Universities of Zurich/ETH (UZH/ETH).

Selwer eng Wunneng sichen (eleng oder fir eng WG ze grënnen):


Wann s du schonn am Virus weess, mat wiers du zesumme wëlls wunne goen oder dass de eleng eng Wunneng wëlls hunn, ass d'Prinzip fir eng Wunneng ze sichen dat nämmelecht. Dëst ass zwar méi opwänneg, wéi an eng bestoend WG anzezéien, mä et huet een och den Virdeel dass een eleng wunnt oder mat Leit déi een kennt. Da kanns de op enger vun den Internetsäiten ënnen no fräie Wunnengen sichen. Pass dobäi op, dass d'Zëmmerunzuel net ëmmer mat der Zuel vu Schlofkummeren iwwereneestëmmt, eng 3.5-Zimmerwohnung kann z. B. eng Wunneng mat 2 Schlofkummeren sinn an 1.5 Kummer ass an deem Fall da Kichen + Wunnzëmmer!

[\[www.homegate.ch\]](http://www.homegate.ch) [\[www.immoclick.ch\]](http://www.immoclick.ch)
[\[www.immo-online.ch\]](http://www.immo-online.ch) [\[www.immovista.ch\]](http://www.immovista.ch)
[\[www.immoscout24.ch\]](http://www.immoscout24.ch) [\[www.home24.ch\]](http://www.home24.ch)



[\[www.comparis.ch/immobilien/\]](http://www.comparis.ch/immobilien/)
[\[www.immostreet.ch\]](http://www.immostreet.ch)

Wat d'Präisser ubelaangt, ass den Loyer vun enger Eenzelwunneng tëscht 800 an 1300 CHF, je no Lag a Confort. Generell (awer och do ginn et Ausnamen) ass et méi bëlleg, wann een z. B. zu 3 eng 3er-Wunneng hellt, wéi wann 3 Leit eng Eenzelwunneng huelen. Dës Präisser sinn just eng Richtlinn, wann een méi laang am Virus ufänkt mat sichen, kann een och méi bëlleg Wunnengen fannen!



Sich der op den Websäiten e puer Wunnengen aus, déi dir gefallen an déi och gutt leien an kontaktéier déi Persounen. Meeschtens ginn se dir d'Méiglechkeet, eng Visitt vun der Wunneng ze maachen. Eng Visitt ass déi perfekt Geleeënheet, fir mat den Responsabelen ze schwätzen an en gudden Androck ze hannerloossen. Eppes wat hëllefräich ass, ass wann een sech am Virus en klengen Dossier zesumme stellt, mat wichtige Dokumenter, déi kenne gefrot ginn: Kopie vu Carte d'Identité, Kopie vun der Opnahmebestätegung vun der ETH (falls een dat nach net huet, een Dokument, dat bestätegt, dass een sech ugemellt huet), Paiziedel vun den Elteren, Kopie vun der Carte d'Identité vun den Elteren, asw. Net all dës Dokumenter gi bei all Wunneng gefrot, et ass vu Fall zu Fall ëmmer en bëssen anescht, am beschten och am Virus nofroen, wat alles gebraucht gëtt. Et ass awer besser, en bëssen ze vill Dokumenter dobäi ze hunn wéi net genuch! No enger Visitt sichen sech d'Agencen eraus, wien d'Wunneng kritt. Fänk fräi un (z. B. am Ufank vun der Sommervakanz no den Examen) eng Wunneng ze sichen an mell dech bei ville Wunnengen, fir deng Chance ze erhéien, och bei enger Wunneng geholl ze ginn. Wann s de

vill Wunnenge wëlls kucke goen, huel der 2-3 Deeg wou s de op Zürech kënns an probéier d'Visitten op déi Deeg ze leeën.

An eng bestoend WG/Studentewunneng anzéien:

De Virdeel an eng WG ze zéien, déi scho besteet ass, dass een net selwer eng eege Wunneng muss sichen, dass d'Offer méi grouss ass an dass et och manner kascht (wann een vill Chance huet fënnt een en Zëmmer fir manner wéi 500 CHF). Du muss der awer och bewusst sinn, dass de déi Leit net onbedéngt



kënns an ganz oft Buedzëmmer an Kichen deele muss. Wann der zu e puer sidd, kënnst der natierlech probéieren an déi nämmlechte WG ze kommen, do muss een da vu Fall zu Fall jeeweils kucken, wat méiglech ass.

D'Woko huet eng ganz Rei Studentenwunnheemer zu Zürech. Si bidde generell Kummere fir all Studenten un, mee si hunn och eng gewëssen Unzuel un Kummere fir nei Studente reservéiert. Wann s de un enger Wunneng bei der Woko interesséiert bass, ass et am beschten, dass de dech fréi mells. Fir weider Informatiounen kanns de op hirer Websäit laanscht kucken: [www.woko.ch]

Oft passéiert et, dass an enger selwer gegrennter WG Zëmmer fräi ginn an Nachmieter gesicht ginn. Et ginn zwou Websäiten, déi sech genee op dës Aart vun Offer spezialiséiert hunn: [www.students.ch] [www.wgzimmer.ch] Op dës Sitte fënns de virun allem fräi Zëmmer, awer et kann och sinn dass fir eng ganz Wunneng Nachmieter gesicht ginn. Wann s du un engem Zëmmer interesséiert bass, schreifs de am beschten och hei direkt en Noriicht. Fro och hei no,

wat fir Dokumenter gebraucht ginn an ob eng Visitt méiglech ass. Et kënnst oft fir, dass wann eng WG een neie Matbewunner sicht, dass eng Aart Interview mat den méiglechen neie Matbewunner gemaacht gëtt.

Um Campus Höggerberg sinn am September 2016 zwee Studentenwunnheemer opgaangen. Wann s du vill Virlesungen um Campus Höggerberg hues ass dat natierlech extrem attraktiv, mä och wann s de am Zentrum Virlesungen hues ass dat praktesch, well vun der ETH aus een gratis Bus ongeféier all 20 Minuten an den Zentrum fiert. Am Studentewunnheem vu livingscience gëtt et 3 Aarten vu Wunnengen: Einzelwunnengen, 2er-WGs an 6er-WGs. Op der Internetsäit vu livingscience kann een nokucken, wat fir Wunnenge fräi sinn an sech direkt fir eng mellen. Well awer relativ seelen eng Wunneng fräi gëtt, kann een hinnen och eng Email schreiwe fir nozefroen, ob een eng Wunneng ka kréien. Méi Informatiounen stinn op der Internetsäit: [www.livingscience.ch]

Daat zweet Studentenwunnheem um Campus Höggerberg heescht Student Village, hei ginn et 6er- bis 10er-WGs. Och hei kanns de op hirem



Internetsite kucken, wat fir Zëmmeren nach fräi sinn an hinnen och direkt eng Email schreiwen, wann s de méi Informatiounen wëlls hunn. [www.studentvillage.ch]

Openthaltseneemegung an Umeldung zu Zürech

Fir an der Schwäiz ze wunne brauchst de eng Openthaltseneemegung. Wann's de an deng Wunneng eraplënners, da muss de dech an deem fir

däi Krees zoustänneg Kreesbüro umellen (fro deen, deen der d'Wunneng verlount huet, wou deen ass).

Do muss du och eng Demande fir eng Openthaltseneemegung maachen. Dofir brauchst de:

- en Auswäis, deen nach op mannst 1 Joer gültig ass
- 1 rezent Foto
- Studiumsbestätigung (Legitimationskarte)
- eng Bescheinigung vun dengem Elteren, dass si fir däi Studium opkommen.

Dobäi kann et sech z. B. och ëm eng Bescheinigung vun der Bank handeln, déi bestätegt, dass deng Elteren iwwer déi néideg finanziell Moyene verfüge fir der de Studium an der Schwäiz ze bezuelen.

D'Openthaltseneemegung gëllt nëmme fir 1 Joer (gëtt all Joer erneiert) a kascht 110 Schwäizer Frang. Ausgestallt gëtt dës Geneemegung vum Migrationsamt. Déi néideg Demarchen iwwerhëlt awer wéi gesot d'Kreesamt wann een sech bis do ugemellt huet.

[https://www.zh.ch/de/migration-integration/einreise-aufenthalt/personenfreizuegigkeit-eu-efta.html#1811095949]



Wat kascht wéi vill?

Semestergeld

ETH: CHF 730.- pro Semester (Dobäi kommen nach ongeféier CHF 69.- Zousatzkäschten, zum Beispill den obligatoreschen Bäitrag fir de VSETH, ASVZ, ...).

UZH: CHF 720.- pro Semester. Dobäi kommen nach ongeféier CHF 54 obligatoreschen Beiträgg fir den ASVZ, ... Dozou kënnst dann och nach, dass Lëtzebuerger en

„Zuschlag Bildungsausländer/inne“ vu CHF 500 pro Semester bezuele mussen.

[http://www.uzh.ch/studies/application/generalinformation/fees.html]

Wann s de dech zu Lëtzebuerg fir d'Aide Financière umells, da kriss de ongeféier d'Halschent vum Semestergeld rembourséiert. [www.cedies.lu]



Loyer

CHF 800-1300.- pro Mount, ofhängeg vu Lag a Confort. Däi Loyer hängt staark dovun of, wat s du fir Erwaardungen un deng Wunneng hues. An der Reegel gëllt: Wat den Wee op d'Uni méi kuerz ass, wat d'Wunneng méi kascht. Och ass eng et méi deier eleng ze wunne wéi wann een an enger WG ass.

Bicher a Material

ca. CHF 300.- pro Semester (hängt vum Studiëgang of). D'Architekturstudente brauchen relativ vill Material an all déi, déi am Labo schaffen, mussen nach mat zousätzlechen Käschten vu ca. CHF 200 – 400.- pro Semester rechnen (Studiëgang Biologie a Chimie).

lessen


ca. CHF 300.- bis 500.- pro Mount (staark variabel; hängt vum perséinlechen Liewensstil of).

Ëffentlechen Transport

Wéi iwwerall an der Schwäiz ass den ëffentlechen Transport zu Zürech ganz gutt ausgebaut. De Réseau besteet aus dräi Komponenten: Den S-Bunnen déi all d'Quartieren an déi Dierfer ronderëm direkt a séier mam Zentrum verbannen, den Trammen déi

d'Hauptlinne mat grouse Passagéierzuele bedéngen an den Busser déi een ganz no un all Punkt vun der Stad bréngen. Nieft dem Vëlo ass den ëffentlechen Transport domadder déi beschte Variant fir sech an der Stad ze beweegen. Wann een méi wéi 9 Méint am Joer zu Zürech ass lount et sech also en Joresabo fir 570CHF ze huelen. A wann et um Weekend eng Kéier e bësse méi spéit gëtt, léist den Zücher ëffentlechen Transport een och net am Stach, et muss een nëmmen 5CHF Nachzuschlag bezuelen a scho kann een mat all den Nuetslinnen ënnerwee sinn. Méi Infoen zum ëffentlechen Transport fënns de op:

[www.vbz.ch] [www.zvv.ch]



Vëlo

Et ass och méiglech mam Vëlo vill Strecken zu Zürech z'absolvieren (denk awer drun, dass d'Strecken net ëmmer riicht sinn). Et ginn eng ganz Rei Plätzen, wou een Occasionsvëlo kafe kann. Mëttlerweil ginn et och vill Applikatiounen fir Bike-Sharing, wou een souwuel normal Vëloen wéi och E-Bikes ka benotzen.

[www.bond.info] [www.publibike.ch]

Internet

Et gi verschidde Méiglechkeeten Accés un den Internet ze kréien. Déi éischt ass iwwer Modem oder ADSL bei den entsprechenden Telefon Provideren.

[www.bluewin.ch] [www.salt.ch] [www.sunrise.ch]

Et gëtt och e groust Glasfasernetz zu Zürech, wou der all Informatiounen op hirer Websäit fannt.

[<https://www.ewz.ch/de/private/glasfaser.html>]

Eng aner Méiglechkeet ass iwwer d'Antenn vun der Televisioun. (D'Usschlossgebühr un des Antenn ass

an de meeschte Fäll an de Niewekäschte vum Loyer verstoppt. Et lount sech dës ze kontrolléieren an am Fall wou een deen Usschloss net benotzt beim Vermieter ofzebestellen.) Heifir kritt een en extra Modem vun der Cablecom zur Verfügung gestallt.

Handy

Du hues ee grouse Choix u Provideren, mat Offeren déi staark änneren, jee nodeem ob s de vill am Ausland oder an der Schwäiz telefonéiers. Nodeems d'Roamingkäschten an der EU ofgeschaaft gi sinn, hunn och all d'Lëtzebuerger Provider hier Roaming-Käschte fir d'Schwäiz fale gelooss. Et mécht also Sënn och déi Lëtzebuerger Tariffer ze betruechten an



seng lëtzebuerger Nummer mam lëtzebuerger Abo ze halen. Trotzdeem ass et praktesch eng schwäizer Nummer ze hunn (fir z.B. Twint (Schwäizer Digicash, Nachzuschlag,...), mee dofir gi et Prepaidkarten, déi een sech einfach zouleeë kann.

[www.swisscom.ch]

[www.sunrise.ch] [www.salt.ch]

[www.m-budget-mobile.ch]

[www.yallo.ch]

Poubelle

Fir däi Knascht zu Zürech z'entsuerge braucht de speziell Poubellsuten, sougenannten "Züri-Säcke". Dës kriss de an all Liewensmëttelbuttek (Coop, Migros, Spar, etc.).

[www.erz.ch]

Et lount sech doheem ze recycelen, well een vill Knascht och gratis kann ofginn, esou zum Beispill Glas, Aluminium, Pabeier, Kartong, PET-Flaschen an organesch Offäll. Méi Informatiounen dozou fënnt een och um Internet.

[www.petrecycling.ch]

Televisioun a Radio

Wéi an Däitschland muss een sech an der Schwäiz melle, wann een e Radio oder eng Télé huet, fir Rundfunkgebühren ze bezuelen. Säit neistem ass all Apparat dee Fernseh- oder Radioprogrammer empfanke ka gebührenpflichteg. Dozou gehéieren also och z.B. de Computer oder den Handy. Allerdéngs rode mir dir ze waarde bis d'SERAPE sech bei dir mell. De Präis beleeft sech op 365 CHF am Joer. Des Gebühr muss awer just eemol pro Haushalt pro Joer bezuelt gi. Wat een also zu méi zesumme wunnt, wat d'Käschte fir jiddere méi bëlle ginn.



Wou kommen d'Suen hir, wou ginn se hin?

Soubals de eng Wunneng an eng Openthaltsgeneemegung hues, kanns de e Kont bei enger Bank oder bei der Post opmaachen. Verschidde Banken hu speziell Studentkonten, wou s de keng "frais de compte" bezuele muss an zum Deel och eng gratis VISA/MasterCard kriss. Fir d'Nuetseile lount et sech besonnesch eng Kéier bei der ZKB ze kucken, well da kann een sech den Nachzuschlag beim ëffentlechen Transport spueren.

[www.postfinance.ch] [www.ubs.ch]

[www.credit-suisse.ch] [www.zkb.ch]

Bei der ETH kanns de scho vum 3. Semester (afhängeg vun dem Departement) un als Hëllefassistent schaffen (Übungen a Praktika betreien, Computer antippen). Do verdéngs de ongeféier 28 Schwäizer Frang brutto pro Stonn.

Verschiedenes

Auto: Führerschäin a parken

Wann een an der Schwäiz wunnt, dierf een dem Gesetz no just dat éischt Joer mat auslänneschem Führerschäin Auto fueren. Lëtzebuerg gëtt awer als "grenznahe Ausland" ugesinn an dofir kënnen d'Lëtzebuerger Studenten nom éischte Joer eng "Bewilligung zum Benutzen eines unverzollten Fahrzeuges" kréien. Dat heescht: All Student mat dëser Geneemegung dierf mat sengem Auto mat lëtzebuergeschem Nummerschëld an Assurance ganz legal an der Schwäiz fueren. Dofir gees de bei d'"Zollamt".



Mathuele muss de:

- Pass/Identitéitskaart
- Pabeiere vum Auto (Gro Kaart)
- Legi
- Auslännerausweis
- CHF 25.-
- Erweidert Immatrulationsbestätigung
- Certificat de résidence (Lëtzebuerg)
- Mietvertrag vun denger Wunneng zu Zürech

Da kriss de nach en Ziedel auszufüllen, op deem se all méiglech Saache wësse wëllen; schreif drop, du géifs zwee Mol pro Mount heemfuere fir deng Famill ze besichen an du wäers an der Semestervakanz net hei. Duerno kriss de d'Geneemegung dann heemgeschéckt.

Allerdéngs brauch een dann nach eng Geneemegung fir mat sengem lëtzebuergeschem Führerschäin an der Schwäiz fueren ze kënnen. Dës Demande gëtt vum Zollamt un d'Straassenverkehrsamt virugeleet, déi engem déi entspreichend Pabeieren dann zouschéckt. Do muss du dann nach eng Kéier 120 CHF

bezuelen. D'Autorisatioun kriss du heemgeschéckt a solls déi och zu all Moment an dengem Auto bei dir droen.

[www.stva.zh.ch]



Eng aner Méiglechkeet besteet dran däi Lëtzebuerger Führerschäin an e Schwäizer Führerschäin ëmzeschreiwen. Wat s de heifir maache muss ass Folgendes: du gees op d'Websäit [<https://www.zh.ch/de/mobilitaet/fuehrerausweis-fahrenlernen/auslaendischer-fuehrerausweis.html>] a luets de Formulaire "Gesuch Umschreibung ausländischer Führerausweis" erof. Dee fëlls de aus an hëls e mat bei en Optiker fir e Sehtest ze maachen. Duerno gëss de en um Strassenverkehrsamt zesumme mam Lëtzebuerger Führerschäin of. Däin neie Schwäizer Führerschäin hues de dann e puer Deeg duerno an der Post. Dat ganzt kascht ongeféier 100 CHF plus 10 CHF fir de Sehtest. Opgepasst: wann s du en eegenen Auto mat Lëtzebuerger Plaque hues, da geet dat hei net. Da muss de Prozedur, déi uewe beschriwwen ass, duerchlafen. Fir de Führerschäin ëmzeschreiwen hues de 5 Joer Zäit no deem s de an d'Schwäiz geplënnert bass. Wann s de also herno eventuell do schaffe wëlls, dann denk drun et ze maachen. Soss muss de den Exame frësch maachen.

Wann s de mam Auto op Zürich kënns, hues de zwou Méiglechkeeten däin Auto ze parken, entweder an enger Déifgarage op der ETH-Hönggerberg oder zu Zürich selwer op der Strooss, an der sougenannter „Blauen Zone“. Dofir brauchst de allerdéngs eng Parkbewilligung, déi s de bei der „Dienstabteilung Verkehr“ kriss, an den Auto muss op dech agedroe

sinn (gro Kaart). Di éischt Méiglechkeet (ETH) kascht CHF 1920.- d'Joer, déi zweet CHF 300.-. Fir all Besuch besteet d'Méiglechkeet online eng Parkkaart fir een Dag fir CHF 15.- ze kafen.

[www.parkkarten.ch]

Mensa

Zimlech bëlleg kanns de an de Mensaen a Cafeteriae vun der ETH an der Uni iessen. Am Verglach zu villen auslännesche Mensaen ass d'ETH- an d'Uni-Mensa lesse gutt bis excellent. Du kanns all Mëtten an all Owend an jiddwer Mensa aus 4 bis 6 verschidde Menüen tëscht CHF 5.40 an CHF 13.- wielen. Dobäi fënns de esouguer ëmmer op mannst eppes Vegetaresches, a munchmol och esou guer eppes Veganes. Verschidde Mensaen hunn och während der Vakanz an Owe op, déi genee Öffnungszäiten fënnt een um Internet.

[www.gastro.ethz.ch] [www.mensa.uzh.ch]

Sport

All Student ass automatesch Member vum "Akademischen Sportverein Zürich" (ASVZ). Dee Veräin bitt der iwwer 120 Sportarten un. Zousätzlech kanns de och an enger vun den LSZ-Equippen (Lafen, Schwammen, Fussball, Volleyball, Basketball...) matspillen. [www.asvz.ch]



Ausserdeem bedeelegt den LSZ sech all Joer un diversen Aktivitéite vum ASVZ, ewéi zum Beispill d'"Volleyballnight" (hei gëtt eng ganz Nuecht laang Volleyball gespilt) oder der SOLA-Stafette


(Mir lafen eng Streck vu ronn 120 km an enger Equipe vu 14 Leit duerch ganz Zürich).



Bibliothéiken

All ETH-Student däerf d'Hauptbibliothék (Hauptgebaai H-Stack) an d'Bibliothék vun deenen eenzelen Abteilunge fir näischt benotzen. D'Hauptbibliothék huet déi gréisst Sammlung vu wëssenschaftlecher Literatur an Europa, an e ganz modernt elektronesch Bestellsystem (Du kanns esouguer vun doheem deng Bicher iwwer Internet bestellen, oder an eng aner Bibliothék liweren loossen). Déi meescht Departementer hunn och nach eng eege Bibliothék, sou gëtt et z.B. um Campus Hönggerberg nach extra Bibliothéike fir Chemiker, Biologen, Pharmazeuten, Physiker an Bauingenieuren. Informatiounen dozou fënns de bei den eenzelen Departementer an um Internet.

[www.library.ethz.ch]



Als Student kriss de Accès net nëmmen zur ETH Bibliothék, mee zu allen Bibliothéiken an der Schwäiz. Ee Beispill: An der Zentralbibliothék Zürich, Zähringerplatz 6, 8025 Zürich gëss de och automatesch Member a kanns vun hire Bicher profitieren.

[www.zb.uzh.ch]

Krankeversécherung

Well all Lëtzebuerger schonn zu Lëtzebuerg krankeverséiert ass, kann een hei an der Schwäiz e "Gesuch zur Befreiung von der Versicherungspflicht" stellen. Soss muss een an eng Schwäizer Krankekeess abezuelen.

Wat een dofir mécht ass Folgendes: et waart een, bis d'"Städtische Gesundheitsdienste" sech bei engem mellit (normalerweis innerhalb vun dräi Méint). Deene schéckt een dann eng Kopie vu senger europäescher Krankekeesskaart an et fëllt een den Formular aus, datt een sech vun der Versécherungspflicht befreie wëll. Dese Formular fënns de um Internet.

[<https://www.zh.ch/de/gesundheit/krankenversicherung.html#-176410988>]

Et schéckt een de "Städtische Gesundheitsdienste" déi ganz Demande, déi dann an d'"Gesundheitsdirektion des Kantons Zürich" weidergeleet gëtt. Dës lescht schéckt der dann och déi definitiv Verfügung, déi 3 Joer gutt ass. Ass een méi laang wéi déi 3 Joer zu Zürich kann een des nach eng Kéier verlängeren.

Wann een dann eng Kéier sollt krank ginn, brauch een nëmmen nach d'Schwäizer Dokteschrechnung, mat Mentioun vu senger Adresse a Kontosnummer, zesumme mat enger Kopie vun der europäescher Krankekeesskaart un



Gemeinsame Einrichtung KVG
Industriestrasse 78
CH-4600 Olten
[www.kvg.org]

ze schécken. Wann dat bis geschitt ass, kritt een an Zukunft all seng Schwäizer Dokter- a Medikamenter-Rechnungen direkt vun de Schwäizer an no Schwäizer Recht zeréck bezuelt (déi dann erëm

d'Sue vun der Lëtzebuergescher Krankekeess zeréckfroen). Bei grousser Behandlungen ass dat méi wéi de Lëtzeburger Tarif an et huet och de Virdeel dass een net muss iwwert déi Lëtzeburger Krankekeess fueren.

Déi europäesch Krankeesskaart soll een iwwerall ginn. Den LSZ huet et och bei sech halen.

Rees Lëtzebuerg – Zürich

Fir vu Lëtzebuerg op Zürich ze fuere ginn et véier Méiglechkeeten:



- Zuch,
- Bus,
- Auto,
- Flieger.

Mam Zuch gëtt et bal all Dag eng gutt Verbindung mat der een an 5:30 Stonnen den Trajet tëscht Lëtzebuerg an Zürich ka maachen. Meescht muss een dann zu Mulhouse an/oder Basel ëmklammen. Präislech ass den Zuch sécherlech net déi bëllegste Variant mat em déi 70€ fir en eenzelen Trajet ouni Reduktiounskaart. Mat der Carte Jeune kann een awer séier emol 30€ am Frankräich spueren, an dëst bei enger Kaart déi een vir 50€ op der Stater Gare krit. Eng weider Reduktioun kann een mat der Halbtax an der Schwäiz kréien. De Virdeel um Zuch ass dat een ënnerwee eppes schaffe kann. Präislech kann een och nach e bëssi spueren, wann een den Ticket duerch Frankräich um franséische Site an den Ticket duerch d Schwäiz um schwäizer Site, hëlt.

[www.sncf.fr] [www.sbb.ch]

Wien gäre méi bëlleg ënnerwee ass kann de Flixbus huelen. Dëse bitt Faarten ab 25€ vir een Wee un. Den Nodeel ass dass des meescht iwwert Nuecht sinn an

een also eng Nuecht schlechte Schlof akaaf huele muss.

[www.flixbus.de]

Op een selwer een zu Zürich huet oder net, den Auto ass ëmmer eng interessant Variant, well bal all Weekend fiert een Lëtzeburger mat sengem Auto heem. Des Faart dauert ongeféier 4:30 Stonnen, ofhängeg vu Chauffeur, Trafic an Streck. Üblecherweis féiert den Trajet ab Lëtzebuerg iwwert déi franséisch Autobunn laanscht Stroossbuerg via Basel an d'Schwäizer Autobunn op Zürich. Alternativ kann een am Ufank iwwert duerch Däitschland bis Saarlouis an dann iwwert Landstrooss d'Opfaart Saint-Avold op déi franséisch Autobunn. Ab der Sortie Saverne kann een via Molsheim d'Streck em Stroossbuerg ofkierzen. De Präis vun enger Faart mam Auto ass nieft dem Sprit ronn 15€ vir Péage am Frankräich an 40CHF pro Joer Vignette an der Schwäiz. Ab méi wéi enger Persoun am Auto ass dës Variant also wierklech interessant. Vir Vermëttlung vu Chauffeuren a Passagéier gëtt et eng extra Facebookgrupp.

[<https://www.facebook.com/groups/159076227572399>]

Mam Flieger gëtt et eng direkt Verbindung vu Lëtzebuerg op Zürich vu Swiss Airlines. Des ass allerdéngs net grad bëlleg. Wann een Chance huet fënnt een Ticketen ab 70CHF, mat staarken Ënnerscheeder jee no Wochendag an ofhängeg wéi fréi am Viraus een reservéiert. Vir dee Präis krit een awer och dee mat Ofstand séiersten Transport gebueden, grad emol 1 Stonn ass de Flieger an der Luucht.

[www.swiss.ch]



Esou wéi an all Studentestad wou vill Lëtzeburger sinn, gëtt et och zu Zürich en Lëtzeburger Studentencercel, an dat scho säit iwwert 90 Joer. Den LSZ huet aktuell ronn 120 Memberen.

Eng vun eisen Aufgaben ass et, zukünftege Studente bei hirer Wiel vum Studium an vun der Uni ze hëllefen. An dëser Broschür sinn eng ganz Rei Informatiounen opgezielt, mä villäicht ass net all Fro beäntwert, villäicht wëlls du nach méi Informatiounen zu



engem spezifesche Studiégank oder du bass dorun interesséiert, dir eng Kéier sur place en Bild vun Zürich ze maachen. Du kanns eis ënner comite@lsz.lu fir allméiglech Froen kontaktéieren. Falls de interesséiert bass Zürich ze besichen, kënne mir dir och eng kleng Féierung duerch d'Uni ginn oder dech mat an eng Virlesung huelen, fir e bëssen um Studenteliewen ze schnupperen.



Fir déi nei Studenten zu Zürich organiséiere mir och e puer Eventer, fir ënner anerem d'Membere vum LSZ awer och d'Stad Zürich besser kennen ze léieren. Zousätzlech kriss du eng Giedel oder en Pätter, déi dech eng Kéier bei sech doheem invitéiere fir z'lesse (du muss awer spullen) an et gëtt wéi och bei anere Studentencercelen eng Aweigung (looss dech iwwerraschen, et ass net esou schlëmm!).

Eng wieder Aufgab vum LSZ ass et, Lëtzebuerger Studenten zu Zürich zesummen ze bréngen, dëst duerch eng ganz Rei Aktivitéiten déi mir iwwert d'Joer plangen. Enner anerem sinn mir sportlech ganz aktiv: mir hunn eng eeg Fussballequipe, déi op den Zürcher Hochschulmeisterschaften matspillt; en Basketgrupp, deen sech reegelméisseg trëfft; mir hunn all Joer eng Equipe op der SOLA, engem Staffellaf vun 114 km zu Zürich; mir organiséieren all Joer en Schiweekend.



Och kulturell Aktivitéite sti bei eis um Programm. Am Fréijoer ënnerhuele mir eng Clubrees an eng europäesch Stad an op eisem Kulturausflug gi mir fir een Dag an eng Stad an der Géigend zu Zürich fir do eng kulturell Sehenswierdegkeet ze besichen.

Ween un en Studentencercle denkt, denkt natierlech och u Fester an Partye, déi natierlech och beim LSZ net feelen. Um Programm stinn do ënner anerem eng Grillparty am Fréijoer, een lesse mat engem Bal

Eise Comité 2020-2021



3. Réi vun lénks no riets: Cathy Tanson, Fanny Goy, Christine Lenertz, Felix Schoellen
 2. Réi vun lénks no riets: Patrick Colgon, Jil Heck, Felix Engel, Paul Mangers, Pit Bechtold
 1. Réi vun lénks no riets: Nicolas Thill, Pit Reckinger, Eric Nothum, Sacha Thill
 Et feelt: Anselmo Malvetti



am Mee, eng Receptioun beim Ambassadeur zu Bern fir Nationalfeierdag, eng Party am November an en Kleesechersowend am Dezember.
 De wichtegsten Datum fir den LSZ ass awer den 25. Dezember. Sait bal 60 Joer fënnt op dem Dag nämlech eisen traditionellen Zürcher Bal © statt. D'Organisatioun vum Bal gëtt komplett vum Comité iwwerholl an fänkt scho fréi am Joer un. Mä nëmmen duerch d'Membere vum LSZ kann den Zürcher Bal esou erfollegräich sinn, wéi en et am Moment



Op eiser Homepage fënns de weider intressant Linken zum Thema Studium an Zürich awer och Kontaktdate vum Comité a Membere fir der bei allméigleche Froen ze hëllefen. [www.lsz.lu]

Méi Informatiounen iwwert eng ganz Rei vun anere Studentestied fënns du am „Guide du Futur Etudiant“ vun der ACEL an an der Broschür „Let's Engineer“ vun der ANEIL fënns de Informatiounen zu deene meeschten techneschen an wëssenschaftleche Studiegäng. [www.acel.lu] [www.aneil.lu]

ass. Hannert den Baren um Bal schaffen nëmme Membere vum LSZ, an och beim Op- an Ofriichte gëtt een Groussdeel vun eisem Cercle geschafft.

De CEDIES steet dir och fir (bal) all Informatiounen mat weidere Broschüren a Publikatiounen zur Verfügung. [www.cedies.lu]

Zu Zürich gëtt et och en Internet-Portal vun de Studenten mat alle méiglechen Informatiounen. [www.students.ch]

Facebook: [LSZ- Lëtzebuerger Studenten Zürich](https://www.facebook.com/LSZ-Letzebuerger-Studenten-Zuerich)
 Instagram: [@lzueri](https://www.instagram.com/lzueri)



All wichteg Adressen op ee Bléck



Eidgenössische Technische Hochschule Zürich (ETHZ)
Zulassungsstelle
ETH Zentrum
CH-8092 Zürich
Tel.: +41 (0)44 633 82 00
Homepage: www.ethz.ch/de/studium/bachelor
www.admission.ethz.ch
E-Mail: zulassung@ethz.ch

Universität Zürich
Universitätskanzlei
Rämistrasse 71
CH-8006 Zürich
Tel.: +41 (0)44 634 1111
Homepage: www.uzh.ch
E-Mail: kanzlei@uzh.ch
Zulassungsstelle
Tel. +41 44 634 22 36
E-Mail: admission@uzh.ch

Étudiants Luxembourgeois à Zurich a.s.b.l. (LSZ)
Postfach: Hauptgebäude ETH
CH-8092 Zürich
Homepage: www.lsz.lu
E-Mail: comite@lsz.lu

Association des Cercles d'Etudiants Luxembourgeois (ACEL)
2, avenue de l'Université
L-4365 Esch-sur-Alzette
Homepage: www.ancel.lu
E-mail: contact@ancel.lu

Association Nationale des Etudiants Ingénieurs Luxembourgeois (ANEIL)
6, bd Grande-Duchesse Charlotte
L-1330 Luxembourg
Homepage: www.aneil.lu

Centre de Documentation et d'Informatioun sur l'Enseignement Supérieur (CEDIES)
18-20 Montée de la Pétrusse
L-2327 Luxembourg
Tel.: 478 8650
Homepage: www.cedies.lu
E-Mail: cedies@mcesr.etat.lu

Ambassade du Luxembourg
Monsieur Jean-Claude Meyer
Ambassadeur extraordinaire et plénipotentiaire
38, Sulgenauweg
CH-3007 Bern
Tel.: +41 (0)31 311 4732 oder +41 (0)31 311 6876

E-mail: berne.amb@mae.etat.lu
E-mail Konsulat: berne.consulat@mae.etat.lu

Ambassade de Suisse
Immeuble Forum Royal
25a, Boulevard Royal
3ème étage
L-2449 LUXEMBOURG
Tel.: +352 22 74 74-1

Adresse postale:
Ambassade de Suisse
B.P. 469
L-2014 Luxembourg
E-mail: luxembourg@eda.admin.ch
<http://www.eda.admin.ch/countries/luxembourg>

An hei nach e puer Adresse vu weidere Schoulen zu a ronderëm Zürich:

HSR Hochschule für Technik Rapperswil
Oberseestrasse 10
Postfach 1475
CH-8640 Rapperswil
Tel.: +41 (0)55 222 41 11

Homepage: www.hsr.ch
E-Mail: office@hsr.ch

Zürcher Hochschule der Künste
Pfungstweidstrasse 96
CH-8005 Zürich
Tel.: +41 (0)43 446 4646 (Zentrale)

Homepage: www.zhdk.ch
E-Mail: info.admin@zhdk.ch

Kaderschule Zürich
(in der Kantonschule Enge)
Rosenstrasse 5
CH-8400 Winterthur
Tel.: +41 (0)44 284 2080

Homepage: www.kszh.ch
E-Mail: sekretariat@kszh.ch

Zürcher Hochschule für Angewandte Wissenschaften
Technikumstrasse 9
CH-8401 Winterthur
Tel: + 41 (0)58 934 71 71

Homepage: www.zhaw.ch

All dës Schoulen huelen Ausländer un, mee et sollt een sech awer vergewësseren ob a wéi d'Diplomer hei zu Lëtzebuerg oder an Europa unerkannt sinn.



Impressum

Editeur

Lëtzebuurger Studenten Zürich a.s.b.l.
2, avenue de l'université
L-4365 Esch-sur-Alzette
Homepage: www.lsz.lu
E-Mail: comite@lsz.lu

Redakteren

| | |
|--------------|--|
| Edition 2000 | Christian Cortina, Sophie Maurer, Luc Zwank et al. |
| Update 2001 | Caroline Heintz, Françoise Molitor, Véronique Gondoin, Michel Dhur, Gilles Radrizzi, Benoît Steinmetz, Brian Burg, Oliver Offermann, Philippe Osch, Jérôme Peeters, Mathis Bruck |
| Update 2002 | Mike Dusseldorf, Brian Burg, Gilles Radrizzi, Oliver Hames |
| Update 2004 | Brian Burg, Anne Feidt |
| Update 2005 | Philippe Kieffer, Steve Heinen, Yves Leiner |
| Update 2006 | Robert Cuny, Vincent Diederich, Isabelle Henschen, Philippe Kieffer, Nicolas Jost, Gil Georges, Annick Schmartz |
| Update 2007 | Robert Cuny, Stéphanie Michels |
| Update 2008 | Daniel Michels, Claude Leyder |
| Update 2009 | Anne Claude, Isabelle Maassen, Luc Oth |
| Update 2010 | Claude Pletsch, Christoph Reckinger |
| Update 2011 | Jean-Michel Sassel |
| Update 2012 | Maurice Delcourt, Marc Sinner |
| Update 2013 | Marc Sinner |
| Update 2014 | Charel Antony, Louis Wagner |
| Update 2015 | Kevin Huberty, Laurent Heyder |
| Update 2016 | Kevin Huberty |
| Update 2017 | Olivier Goerens, Joé Hoffmann |
| Update 2018 | Rafael Lombardi, Charel Thull |
| Update 2019 | Philippe Bechtold, Pol Eyschen, Pit Bechtold, Joé Wengler |
| Update 2020 | Christine Lenertz, Pit Bechtold |

Originale Layout an Design

Isabelle Maassen, Max Schmitz (REEL.org asbl.)

Layout an Design

Max Schmitz

Fotoen

Ale Ceci, alex.ch, belpo, Benny Huberty, Blue Funnies, Caramdir, caribb, coyote-agile, eGuide Travel, Hideo Breden, Isabelle Henschen, Jules Petit, Max Schmitz, Peter Alfred Hess, www.ethz.ch, yago1.com
E spezielle **Merci** un den Dr. Martino Luginbühl, eemolegen Studienberater vun der ETH Zürich.

ACEL- De Studentevertrieder

Mir sinn fir dech do!
Virun, während an no dengem Studium!




INFORMATION

Mam GUIDE DU FUTUR ÉTUDIANT hues du all d'Infoen fir de Start vun dengem Studium. Während dengem Studium steet dir dann DE STUDENTEGUIDE zur Säit. De GUIDE DU FUTUR DIPLÔMÉ hëlleft dir fir d'äin Wee an d'Aarbechtswelt ze erliicheren. Dës dräi Broschüren fenns du ënner: www.acel.lu/publikatiounen.



Beim STUDENT FIR 1 DAG weise mir dir deng zukünfteg Uni.







REGROUPEMENT

Mir organisieren DE STUDENTEBAL, dee gréissten Open-Air Bal fir Studenten, ewéi och den TOURNOI DE NOËL. Allebéid bréngen déi iwwer 40 Cercles an hier Memberen zu Lëtzebuerg zesummen.



REPRESENTATIOUN

Mir sinn am reegelméissegem Kontakt mat de Ministeren an vertrieden deng Rechter an Interessen. Mir probéiere fir all potentielle Studenteproblem eng Léisung ze fannen an dech beschtméiglech ze beroden.





Lëtzebuurger Studenten Zürich

